



06. apríl 2017

Bréfalykill: 230

Reykjavík, 4. apríl 2017  
VEL2015050007  
4.13  
Tilvísun R17030298

Borgarráð  
Ráðhús Reykjavíkur  
101 Reykjavík

**Svar við fyrirspurn borgarráðsfulltrúa Sjálfstæðisflokkssins og Framsóknar og flugvallarvina um breytingar á starfsemi velferðarsviðs að Rangárseli 16-20.**

Eftirfarandi fyrirspurn var lögð fram á fundi borgarráðs þann 30. mars 2017.

Um árabil hefur verið rekinn íbúðakjarni fyrir fatlað fólk að Rangárseli 16-20 í góðri sátt við íbúa hverfisins. Nú standa yfir breytingar á húsinu, sem m.a. felast í uppsetningu hárra öryggisgirðinga og er jafnframt gert ráð fyrir breytingum á íbúahópi þess. Óskað er eftir upplýsingum um þessar breytingar og hvort þær áhyggjur íbúa hverfisins, hvort þarna verði íbúar sem með einhverjum hætti geti talist ógn við umhverfi sitt, eigi við rök að styðjast. Hyggst velferðarsvið halda samráðsfund með íbúum í nágrenninu vegna þessara breytinga?

Frá árinu 2001 hefur verið rekinn íbúðakjarni fyrir fatlað fólk í Rangárseli 16-20. Við yfirlæslu málauflokks fatlaðs fólks frá ríki til sveitarfélaga árið 2011 tók Reykjavíkurborg við rekstri íbúðakjarnans. Á árinu 2015 og í byrjun árs 2016 urðu breytingar á samsetningu íbúahópsins. Hluti íbúa flutti burt og nýir íbúar fluttu inn, meðal annars fyrrum íbúar á Sæbraut á Seltjarnarnesi. Þessar breytingar gengu ekki áatakalaust fyrir sig þar sem hluti íbúa í nágrenni Rangársels mótmælti breytingunum harðlega og var meðal annars haldinn opinn íbúafundur í Seljakirkju til að fara yfir málið. Sátt náðist að lokum.

Í tengslum við samstarf velferðarráðuneytis, Reykjavíkurborgar og Landspítala um uppbyggingu styrktrar búsetu til framtíðar og lausn á bráðavanda 2ja fatlaðra einstaklinga var hafist handa, haustið 2016, við að leita að heppilegu húsnæði. Leitað var til skrifstofu eigna og atvinnuþróunar og Félagsbústaða en ekki fannst heppilegt húsnæði. Á þeim tímapunkti voru tvær íbúðir í Rangárseli lausar og var ákveðið á velferðarsviði að leysa vanda umræddra einstaklinga með þessum íbúðum enda hentuðu þær mjög vel sem tímabundin lausn út frá faglegu sjónarhorni. Þær voru rúmgóðar, á jarðhæð og auðvelt að gera nauðsynlegar breytingar. Um er að ræða tímabundna lausn meðan unnið er að framtíðaruppbryggingu styrktrar búsetu í Stjörnugrófinni.

Styrkta búsetan í Rangárseli verður með þeim hætti að fyllsta öryggis verður gætt í þjónustu og stuðningi við íbúana tvo og verður þjónustan algjörlega aðskilin frá annarri starfsemi í húsinu. Gert er ráð fyrir að að tveir einstaklingar fylgi hvorum einstaklingi fyrir sig allan sólarhringinn og sérstakur forstöðumaður verður yfir búsetunni. Girðing við íbúðir er hækkuð til að verja umrædda einstaklinga frá umhverfinu. Íbúðirnar snúa að Seljakirkju og eru ekki í augsýn frá öðrum húsum / íbúðum í Rangárseli. Miðað við mönnun, þjónustu og stuðning við

íbúana er ekki gert ráð fyrir að umhverfinu geti staðið ógn af þeim.

Fulltrúar íbúa í hverfinu hafa óskað eftir fundi með velferðarsviði til að ræða hækjun girðingar og reifa áhyggjur af breytingum og var sá fundur haldinn 31. mars sl. Þar voru mál rædd og var fulltrúum íbúa boðið að haldnir yrðu reglulegir samráðsfundir með þeim þann tíma sem gert er ráð fyrir að umræddir íbúar búi í Rangárseli. Ekki stendur til að halda opinn íbúafund um málið. Það er ekki talið forsvaranlegt þar sem um two einstaklinga er að ræða og því erfitt að gæta persónuverndarsjónarmiða á opnum fundi.

Sú þjónusta sem veita á nýjum íbúum í Rangárseli verður á grundvelli samninga við velferðarráðuneytið og kostuð af ráðuneytinu umfram þá grunnþjónustu sem viðkomandi einstaklingar eiga rétt á samkvæmt lögum um félagsþjónustu sveitarfélaga nr. 40/1991 og lögum um málefni fatlaðs fólks nr. 59/1992.

Virðingarfyllst

  
Regína Ásvaldsdóttir  
sviðsstjóri